

## Droch-aimsir

**Ceist 1** Beidh tú ag féachaint ar thuairisc faoin droch-aimsir ar ball. Sula bhféachann tú ar an tuairisc áfach, déan plé leis an duine in aice leat ar a bhfuil ar eolas agaibh faoi na scéalta nuachta seo a leanas:

Ganntanas uisce sa tír  
Scolleanna na tíre a bheith dúnta  
Cúrsaí taistil sa tír

**Ceist 2** Féach ar an mhír anois agus déan iarracht an leagan Gaeilge de na frásaí seo a aimsiú. Ansin cuir do chuid freagraí i gcomparáid le freagraí an duine in aice leat.

1. emergency committee \_\_\_\_\_
2. to discuss \_\_\_\_\_
3. local authorities \_\_\_\_\_
4. to limit \_\_\_\_\_
5. reservoirs \_\_\_\_\_
6. warning \_\_\_\_\_
7. doing their best \_\_\_\_\_
8. normal practice \_\_\_\_\_
9. weather conditions \_\_\_\_\_
10. thawing \_\_\_\_\_

**Ceist 3** (a) Cén moladh a thugann na dreamanna éagsúla seo chun dul i ngleic leis na fadhbanna áirithe:

An Rialtas  
Batt O'Keeffe  
Aerfort Chorcaí

(b) Cuir do chuid freagraí i gcomparáid le cinn an duine in aice leat.

Ceist 4 *ag déanamh / á dhéanamh / a dhéanamh*

(a) Cén ghné den ghramadach atá i gceist leis na samplaí i *gcló iodálach* thuas?

(b) Cuirigí na briathra seo (a bhí le cloisteáil sa mhír) in abairtí leis an ghné thuas a léiriú:

Pléigh  
Coimeád  
Caomhnaigh  
Mol  
Úsáid

**Sampla:**

*Tá sé ag cur sneachta inniu.*

*Ba mhaith liom an Ghaeilge a chur chun cinn sa scoil.*

*Tá an Ghaeilge á cur chun cinn aige sa scoil.*

Ceist 5 Aimsigh na focail a bhí le cloisteáil sa mhír a bhfuil malairt brí acu leis na focail seo a leanas:

laghdú	_____
chomh hard	_____
ag dul in olcas	_____
go hidirnáisiúnta	_____
míchúramach	_____

Ceist 6 Pléigh na ceistanna seo thíos leis na daoine i do ghrúpa:

Conas mar atá an aimsir i do cheantar féin?

Cad is cúis leis an droch-aimsir seo, dar leat?

An síleann tú go bhfuil an rialtas ag déileáil go héifeachtúil leis na fadhbanna ar fad a bhaineann leis an droch-aimsir?

## Treoracha agus Freagraí

### Ceist 1

Iarr ar gach beirt plé a dhéanamh ar a bhfuil ar eolas acu faoi na scéalta nuachta seo.

### Ceist 2

1. emergency committee coiste éigeandála
2. to discuss a phlé
3. local authorities údaráis áitiúla
4. to limit teorainn a chur le
5. reservoirs taiscumair
6. warning foláireamh
7. doing their best ag déanamh a ndíchill
8. normal practice gnáthchleachtas
9. weather conditions cúinsí aimsire
10. thawing ag leá

### Ceist 3

(a) An Rialtas – Tá an rialtas ag impí ar gach duine uisce a chaomhnú de bharr ganntanas uisce in áiteanna áirithe sa tír.

Batt O’Keeffe – Go leanfaí leis an ghnáthchleachtas scoile, go bhfuil gach scoil sa tír freagrach as an scoil a oscailt nó a choinneáil dúnta, ag brath ar an aimsir i gceantar na scoile sin.

Aerfort Chorcaí – Moltar eitiltí ar fad a sheiceáil leis na haerlínte.

(b) Iarr ar na foghlaimeoirí a gcuid freagraí a chur i gcomparáid lena chéile.

**Ceist 4**

(a) An t-ainm briathartha

(b) *Pléigh*

Chaith siad an oíche ar fad ag plé an ábhair.  
Tá an t-ábhar á phlé faoi láthair acu.  
Bhí cruinniú acu leis an ábhar a phlé.

*Coimeád*

Tá an fear sin ag coimeád a chuid airgid.  
Tá a chuid airgid á choimeád go maith aige.  
Caithfidh tú an scéal a choimeád faoi rún.

*Caomhnaigh*

Tá na hIodálaigh go maith ag caomhnú a gcultúir.  
Tá uisce á chaomhnú ag muintir na cathrach.  
Tá foláireamh tugtha ag an rialtas uisce a chaomhnú.

*Mol*

Táthar ag moladh do phaisinéirí dul abhaile.  
Bhí a lán daoine á moladh go hard na spéire.  
Caithfidh muid an duine sin a mholadh ar ball.

*Úsáid*

Tá muintir na hÉireann ag úsáid an iomarca uisce.  
Tá an t-uisce ar fad á úsáid róthapa.  
Caithfidh siad an t-uisce a úsáid.

**Ceist 5**

laghdú	méadú
chomh hard	chomh híseal
ag dul in olcas	ag dul i bhfeabhas
go hidirnáisiúnta	go háitiúil
míchúramach	cúramach

**Ceist 6**

Tabhair tamall do na foghlaimeoirí na ceisteanna anseo a phlé.

## Droch-aimsir

### Irene Ní Nualláin

Bhí cruinniú ag coiste éigeandála an rialtais ar maidin le cúrsaí aimsire a phlé. Tháinig méadú fiche cúig faoin gcéad ar úsáid uisce i mBaile Átha Cliath inné, agus tá sé údarás áitiúil sa chontae <sup>1</sup> ag cur teorann leis an méid uisce ar féidir a úsáid de bharr ganntanas uisce. Tuairiscítear nach bhfuil mórán uisce fágtha <sup>2</sup> i dtaiscumair ar fud na tíre agus nach raibh leibhéal an uisce chomh híseal riamh i gcuid acu. Tá foláireamh tugtha ag an rialtas uisce a chaomhnú.

### Brian Cowen

Chonaiceamar go bhfuil a lán oibre <sup>3</sup> á dhéanamh ag na húdaráis áitiúla, a lán daoine chun na bóithre a choimeád oscailte agus go mbeadh daoine in ann saol eacnamaíochta na tíre a chur chun cinn in ainneoin na drochaimsire <sup>4</sup> atá againn. I mo thuairimse tá gach éinne ag déanamh a ndícheall chun go mbeimis <sup>5</sup> in ann dul ar aghaidh mar ba ghnáth.

### Irene Ní Nualláin

Agus cúrsaí aimsire ag dul chun feabhais inniu, d'fhógair an tAire Oideachais, Batt O'Keeffe go bhfillfí ar ghnáthchleachtais maidir le hoscailt <sup>6</sup> scoile, is é sin go ndéanfaí an cinneadh go háitiúil ag brath ar chúinsí aimsire sa cheantar agus scoileanna a bhfuil sé ar a gcumas oscailt amárach gur cheart dóibh sin a dhéanamh.

Tá Aerfort Chorcaí oscailte arís tar éis a bheith dúnta ar feadh sé uair a chloig déag de bharr sneachta trom. Táthar ag moladh do phaisinéirí seiceáil leis na haerlínite maidir lena n-eitiltí. Agus, cé go bhfuil an sneachta agus leac oighir tosaithe ag leá, táthar ag moladh do dhaoine a bheith cúramach mar go bhfuil bóithre fós sleamhain in áiteanna. <sup>7</sup>

Irene Ní Nualláin, Nuacht TG4, Baile Átha Cliath.

---

<sup>1</sup> sa gcontae a deirtear

<sup>2</sup> fanta a deirtear

<sup>3</sup> obair a deirtear

<sup>4</sup> an drochaimsir a deirtear

<sup>5</sup> go mbeadh muid a deirtear

<sup>6</sup> le oscailt a deirtear

<sup>7</sup> in áiteacha a deirtear.